

編號 4 號

【甘蔗下个蟬仔】羅紫云原作

屋脣該埕<sup>1</sup>竹甘蔗<sup>2</sup>種幾下年咧，當大叢，斬忒又會過綻筍，繼續煞猛生到青里里仔，長目多汁，清甜好食。

逐年大體對五月開始，日日到臨晝仔，就會有一群著等青衫，當靚、當得人惜，頭大尾尖、翼長个草蟬，細細仔像手指尾恁大隻定定，黏在這長長青色个甘蔗葉下，盡命粘在該啦歌哩曲，鬧熱煎煎。佢兜總係唱等：「揸揸揸<sup>3</sup>——揸揸揸——」甜美个歌聲，一直到下晝兩點零正會煞棚，完全無喊恸。

草蟬下班，續等嫲牯蟬<sup>4</sup>跔等上棚，毋過，嫲牯蟬係黏在竹甘蔗脣該叢榮榮个苦棟樹頂，佢算係最大隻个蟬仔，臉身著等一身烏色个西裝盡派頭，大聲唱等屬於佢兜个愛戀歌：「蟬——蟬蟬蟬！蟬——蟬蟬蟬！」佢兜做下背等一臺自家製造个放送頭<sup>5</sup>，亮亮个聲放送到盡遠都聽得著。佢心情好个時節，就安腦佢兜唱歌仔當好聽，心情毋好時，又試著佢兜吵耳塞窟。但係一想著佢兜

來到這世界上，斯有短短幾日仔，就當佩服佢兜恁勇敢、恁煞猛打拚个精神，來完成唯一愛做个聲事<sup>6</sup>——傳宗接代，該就無麼个好怨嘆，乜原諒佢兜个嘶骸另命咧。

在這鬧熱个時節，佢兜張凳仔恬恬坐在甘蔗脣詳細聽，還會發現佢兜毋係儘採唱个哦，曉得照順序、有條理，成時獨唱、成時合唱輪等來，像有人指揮樣，聲音有嘹亮、低沉；時大、時細，所發出个聲無幾共樣，有个較尖；有个較溫柔。其實，蟬仔有當多種，有一年、三年、五年、十三年、十七年个，長年都戴在泥竇肚不見天日。在暗摸摸个烏泥裡肚，培養破土个熱情；在多年个等待中，化地底个能量做聲量，衝破重圍飛出來，就係為著這短短幾日个自由。

佢心肝肚緊想：這埕甘蔗無落肥，敢係因為聽了蟬仔熱情嘹亮个歌聲，正緊生緊高緊榮？該恁佢人，乜愛像蟬仔恁知足，知恩圖報，逐日天轉笠嫲花，這一生人就多姿多彩咧！

<sup>1</sup> 埕：音 pu；量詞，堆。

<sup>2</sup> 竹甘蔗：音 zhug gam` zha`；綠皮的甘蔗。

<sup>3</sup> 揸揸揸：音 rham` rham` rham` rhi；草蟬的叫聲。借字。

<sup>4</sup> 嫲牯蟬：音 ma gu` sham；此指臺灣熊蟬。

<sup>5</sup> 放送頭：音 fong` sung` teu；麥克風。

<sup>6</sup> 聲事：音 shang` she`；工作。

編號 6 號

【金黃色个旅行】曾雪蓉原作

旅行係一種當好个休閒活動，做得分人心情鬆爽，又做得摺最靚个回憶留下來，另外旅行也係一種學習，有一句話講：「行萬里路，贏過讀萬卷書」，在旅行个時節，一路看著个、聽著个，可能比在書齋肚學著个還較精彩、生趣。

在印象裡肚，佢最懷念个一擺旅行，係前幾年俾八月半个時節，爺哀帶佢歸屋下人去花蓮遠寮。

佢兜來到花蓮富里个六十石山，一路上感覺花蓮个空氣特別好，一聲又一聲大鷓鴣歡喜又自在个歌聲，響在彎彎幹幹个山路叮，佢兜盤飛在高高个雲頂，打開梟雄个翼甲，無分日夜在這遍山頭巡邏，佢兜係這遍天地个山大王，也係保護者。

等阿爸摺車仔停在忘憂亭，佢一下車就看著滿山滿坪个金簪花<sup>1</sup>開到當鬧、當打眼，想起識在電視裡肚看過一隻介紹花蓮金簪山个節目，講這位係一隻靚到會分人「發狂」个所在，這句話正經半點都毋會爭差。在佢企在這高高个涼亭時節，看著歸遍个山頭，變成金黃色个世界，帶等泥香、野花香个山風在對面吹過來

該下，毋知仰般，佢个心肝頭就有一種感動還有幸福个感覺，佢想這就係大自然个力量。

阿爸講：「前人種樹後人涼，前人種竹後人搖。」這山頭个金簪花，係盡多前人開山打林開墾出來个，所以來到這邊寮个時節，愛曉得珍惜，毋單淨愛摺這美景用相片帶轉屋下，也愛摺自家个垃圾處理好，恁樣年年正有靚靚个風景好欣賞啊！

在夕陽像一隻啾紅个柑仔，掛在天邊个時節，本旦開到盡有精神个金簪花，像約定好共下下班樣，全眨等目珠互相偎燙，恬恬仔睡忒咧；難怪金簪花又安到「一日美人」，佢踅等朝陽跣床，又在日頭落山時節，合起佢錫人个花裙，做一隻靚一日个美人。

時間過忒盡久，成時佢還係會想起該擺「金黃色个旅行」，當像又聽著大鷓鴣歡喜个歌聲，盡久……盡久。

<sup>1</sup> 金簪花：音 gim` zam` fa`；金針花。